

# Pailimon

Yesu wel wiak kutömweri sēen wē krismaki 32 pōta ök won sēen Pool Rom kak wii kaatak wē pep epwer Pailimon pimēen retēng ēa. Pailimon pōp omnant kēsang wieäupök Kolosi kak wēen ingre mor saurō pim kaatak wa top ēeima. Poolē epwer retēng ēaō pōta songōnte epēl. Pailimonē inēen ru namp, Onisimas, pim omēn nent kēkain ēak kas Rom kakē sa. Pēl ēak Pool koirak lup kaip tiak Kristoon kön wi kosang wesa. Pēl ēēn Poolök Onisimas kaalak Pailimonē naē wes yamēem Pailimonök pim saunet won mowasēpēnēak pep epweri ök mēak mangkēn wak sa.

## Pöt epēl wia.

Ngön ngēs rēaut 1-3

Pailimon pimtēen yaya ngōnte 4-7

Onisimas pimēen kimang mēēaut 8-22

Ngön mēēt 23-25

---

<sup>1</sup>O Pailimon, ne Pool Yesu Kristoē ngōnte yaataan wii kaatak neulēaupök Timoti tepērim ngōntōp piiring wē tenpim ya ngawiap nimēen pep epwer retēng ē yaningk. <sup>2</sup>Öng Apia tenpim karipre Akipas tenpim yeē pōl Anutuu yaat kosang ngentiak yamēngk pōpre ingre mor saō nim kaatak ngōnēnēen wa top ē yaē pōrōaanta yoōre ērēp yak.

<sup>3</sup>Anutu tiarim Pēpape Aköp Yesu Kristo piarpim komre kolapre mayaap pöt ningkēn arim naē wiaap.

## Pool pi Pailimonēen Anutuun kimang ngōntak yoōre ērēp mēea

<sup>4-5</sup>Pailimon, ni Aköp Yesuun kön wi kosang wesak Anutuu omnarōen lup sant yaalmēan pöt narōak aan kat wiaut. Pōtaanök ne kēt ēl epotē nimēen Anutuun kimang ngōntak yoōre ērēp maim wē. <sup>6</sup>Ni omnarōen nim Kristoon kön wi kosang yewesa pōten ök maan tiar Kristook yal ēak wēen Anutuu tiarēn ompyaō yaalni pōten ēwat sēpēnēak kimang yemak. <sup>7</sup>Ngōntop, ni Anutuu omnarōen lup sant elmēen pit ya kē sa. Pēl ēēn ne pöt kat wiak ya kē sak ērēpērēp yeē.

## Pool pi Pailimonōn Onisimas sant mowasēpēnēak mēea

<sup>8</sup>Ni lup sant yaalmēan pōtaan epēl niamaan kat wi. Kristook pim yaatak neulēen wē. Pōtaanök nook omnant ēēmēen kēk niamēak pöt

pangk niamaat. <sup>9</sup>Pël ëëmaatak tepër nampnampëën yak lup sant yeë pötaan wiap wesak niamaan. Ne Pool omp ulöpöp Yesu Kristo pimëën yak wii kaatak neulëën wëaupök <sup>10</sup>Onisimas, nem ruup, pimëën kosang wesak kimang yeniak. Nem wii ka eptak wëautak piin Kristöe songönte ök maan kön wi kosang wesak nem ru sak wë. <sup>11</sup>Pi ngaan nim inëën yaaupök pim akunet pet nairën wiaan nim sëp wesautak ompyaö wesak kaamök naalniin ëaup, peene tepër pouwaar yok pangk kaamök elniipnaap. <sup>12</sup>Pötaanök nook pi nim naë wes mëen yewais. Pi nem ru ulöpöököp yak ne sëp newsak nim naë yewaisën ya këlangön yaë. <sup>13</sup>Ne Kristöe ngön ompyaut ök yaautaan wii kaatak neulëën wëaupök pi nim urötak kaamök elnëëpënëak kent yaë. <sup>14</sup>Pël yaëetak ni pötaan kuure mak nenëaan wiaan piin maan nem naë öpënëak kön nawiin ëaut. Pöt ni ompyaö elnëak piin maan öpnaan ke urak niamaaten kaaö yaë. Könöök pël elnëëmëëten kent yaë.

<sup>15</sup>Ne kön wiin Onisimas pi kaalak wais niiring sasa öpnaataan Anutuuk maan akun kot nent sëp niwesa. <sup>16</sup>Ngaan pi nim inëën ru wakaimaup. Peene pöt, pöt pëën won. Pi nim ëan pöl Kristook yal meneë yak inëën pëën won, nim kar panë sak wë. Ne piin lup sant yaalmë. Ën ni ne il newsak nim inëën ruupök nim ëa pöl Aköpön kön wi kosang wesak wëën lup sant kësang pan elmëeim ömëëp. <sup>17</sup>Ni kön wiin tepër Kristöe yaat yamëngkauwaar pël wesak pöt nim neen sant yaalnëën pöl piinta elmë. <sup>18</sup>Pi utpet nent elnia ma omën nent nim naëaan këkain ëa pöt ök neaan kangiir nimpaat. <sup>19</sup>Ne Pool nemtë moresök epël retëng yeë. Onisimas pim omën nim naëaan wa pötë kangiir nimpaan. Ni ëwat wëën pötaan ngolöp nuwesak epël neniangan. Ne kaamök elniin Kristöe omën sak wëën pötaan nim naë kangiir nampë kësang nent wia. <sup>20</sup>Pötaanök Aköpëën yak ne ompyaö elnëak Onisimas sant mowas. Tepër Kristook yal menak wëerek pël elnëën ya kë sumaan.

<sup>21</sup>Ni nem këm ngönte ngaarëk ömëët pël kön wieë pep epwer retëng ë yaningk. Yaap, ne kön wiin ni il wesak munt nantta ëëmëëp. <sup>22</sup>Ne kön wiin Anutuuk nim kimang yamëëaut kat wiak wil neulëën nim naë waisumaap. Pötaanök Onisimas pim nim naë waisëpnaatak ne nim naë wais ömaan ur nent kopëta was.

### Yoöre ërëp ngönte

<sup>23</sup>Epapras, Yesu Kristöe ngönte ök yaautaan wii kaatak moulmëën neering wë pöp pi yoöre ërëp yenia. <sup>24</sup>Ën Maakre Aristakasre Timasre Luk neering ya yamëngka pörö pitökta tapël yenia.

<sup>25</sup>Aköp Yesu Kristo pim komre kolap pöt arim lupmeri wiaap.

[Yok pi tapët.

Ne nim karip, Pool.]